

Na osnovu člana 27. stav (1) tačka 6. Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“, br. 39/03, 22/06 i 43/10) i čl. 22. i 24. stav (1) Zakona o Vladi Kantona Sarajevo („Službene novine Kantona Sarajevo“, broj 24/03 - Prečišćeni tekst), Vlada Kantona Sarajevo, na 24. sjednici održanoj 07.06.2013. godine, donijela je

UREDBU O OSNIVANJU ŠTABA CIVILNE ZAŠTITE KANTONA SARAJEVO

I - OSNOVNA ODREDBA

Član 1. (Predmet Uredbe)

Ovom uredbom osniva se Štab civilne zaštite Kantona Sarajevo (u daljem tekstu: Štab civilne zaštite), kao operativno-stručni organ Kantona Sarajevo (u daljem tekstu: Kanton) za zaštitu i spašavanje ljudi i materijalnih dobara od prirodnih i drugih nesreća i zaštitu od požara, uređuje njegov djelokrug, unutrašnja organizacija, popuna, finansiranje, opremanje, obučavanje i osposobljavanje i druga pitanja od značaja za organizaciju i rad Štaba civilne zaštite.

II - NADLEŽNOST ŠTABA CIVILNE ZAŠTITE I NAČIN OSTVARIVANJA FUNKCIJE

Član 2. (Nadležnost Štaba civilne zaštite)

(1) Štab civilne zaštite je operativno-stručni organ Kantona koji je ovlašten za vršenje poslova koji su mu dati u nadležnost Zakonom o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“, br. 39/03, 22/06 i 43/10) (u daljem tekstu: Zakon), Zakonom o zaštiti od požara i vatrogastvu („Službene novine Federacije BiH“, broj 64/09), kao i drugim propisima koji regulišu ovu oblast.

(2) U vršenju poslova iz svoje nadležnosti Štab civilne zaštite, funkcionise u miru samo onda kada nadležni organ, odnosno Vlada Kantona Sarajevo (u daljem tekstu: Vlada Kantona), proglasi da je nastalo stanje prirodne i druge nesreće na području Kantona odnosno kad treba preventivno djelovati prije nastanka prirodne i druge nesreće, kao i za vrijeme vježbi civilne zaštite, a u ratu funkcionise stalno. Kada ne postoje prirodne ili druge nesreće, Štab civilne zaštite svoje funkcije ostvaruje povremeno, prema potrebi i to onda kada razmatra stanje priprema, organizovanost, opremljenost i osposobljenost za zaštitu i spašavanje svih nosilaca zaštite i spašavanja na području Kantona i predlaže

mjere za dogradnju sistema zaštite i spašavanja i kada djeluje preventivno, u cilju sprečavanja nastajanja prirodne ili druge nesreće i učestvuje u vježbama i drugim vidovima obučavanja i osposobljavanja.

Član 3.

(Aktiviranje Štaba civilne zaštite kada prijete neposredna opasnost)

(1) Izuzetno od odredbe člana 2. ove uredbe, Štab civilne zaštite se aktivira i u slučaju kada prijete neposredna opasnost od nastanka prirodne i druge nesreće na području Kantona u cilju preduzimanja mjera na sprečavanju nastanka te opasnosti ili nesreće ili ublažavanja njenog djelovanja i funkcionira dok takva opasnost postoji.

(2) Aktiviranje Štaba civilne zaštite u ovim situacijama vrši Kantonalna uprava civilne zaštite (u daljem tekstu: Uprava), dok Vlada Kantona ne proglasi stanje prirodne ili druge nesreće ili odluči da Štab nastavi djelovati dok se ne otkloni opasnost, odnosno nesreća bez proglašavanja tog stanja.

(3) U uslovima iz stava (2) ovog člana aktivirani Štab civilne zaštite ovlašten je da naređuje upotrebu snaga i sredstava zaštite i spašavanja koja pripadaju opštini, Gradu i Kantonu i sve mjere zaštite i spašavanja koje mogu doprinijeti sprečavanju nastanka opasnosti ili nesreće ili ublažavanja njenog djelovanja, kao i mjere, postupke i zadatke koje su u funkciji spašavanja zaštite i zbrinjavanja ljudi i materijalnih dobara ugroženih tom opasnošću, odnosno nesrećom.

Član 4.

(Pružanje pomoći)

Štab civilne zaštite odlučuje o pružanju pomoći štabovima civilne zaštite drugih kantona na njihov zahtjev i traži pomoć od tih štabova kada se ukaže potreba za tom pomoći i pruža pomoć općinskim štabovima civilne zaštite na području Kantona u izvršavanju poslova iz njihove nadležnosti.

III - ORGANIZACIJA I SASTAV ŠTABA CIVILNE ZAŠTITE

Član 5.

(Sastav Štaba civilne zaštite)

Štab civilne zaštite čine komandant, načelnik i 13 (trinaest) članova (u daljem tekstu: članovi Štaba civilne zaštite).

Član 6.

(Komandant Štaba civilne zaštite)

Ministar prostornog uređenja i zaštite okoliša, po položaju je komandant Štaba civilne zaštite.

Član 7.

(Načelnik Štaba civilne zaštite)

Direktor Uprave, po položaju je načelnik Štaba civilne zaštite.

Član 8.

(Član Štaba civilne zaštite po funkciji)

Sekretar Crvenog križa Kantona Sarajevo, po funkciji je član Štaba civilne zaštite.

Član 9.

(Članovi Štaba civilne zaštite iz kantonalnih ministarstava i drugih kantonalnih organa uprave)

(1) Članovi Štaba civilne zaštite su:

- a) pomoćnik ministra iz Ministarstva zdravstva,
- b) pomoćnik ministra iz Ministarstva privrede,
- c) pomoćnik ministra iz Ministarstva finansija,
- d) pomoćnik ministra iz Ministarstva stambene politike,
- e) pomoćnik ministra iz Ministarstva saobraćaja,
- f) sekretar Uprave,
- g) pomoćnik direktora Uprave za mjere zaštite i spašavanja,
- h) pomoćnik direktora Uprave za normativno pravne poslove,
- i) pomoćnik direktora Uprave za zaštitu od požara i vatrogastvo,
- j) direktor Veterinarske stanice Kantona Sarajevo.

(2) Ostala dva člana Štaba civilne zaštite čine državni službenici Uprave koje odredi direktor Uprave, a koji izravno obavljaju poslove zaštite i spašavanja i poslove zaštite od požara.

Član 10.

(Postavljenje i razrješenje članova Štaba civilne zaštite)

(1) Članove Štaba civilne zaštite postavlja i razrješava Vlada Kantona, na prijedlog direktora Uprave koji je usaglašen sa kantonalnim ministrima i rukovodiocima drugih kantonalnih organa uprave iz člana 9. ove uredbe, s tim što su isti dužni osigurati dosljednu primjenu kriterija iz odredbe člana 9. ove Uredbe

(2) Štab civilne zaštite vrši poslove iz svoje nadležnosti samostalno i za svoj rad je odgovoran Vladi Kantona.

Član 11.

(Angažovanje stručnjaka)

(1) U izvršavanju složenijih zadataka zaštite i spašavanja Štab civilne zaštite može angažovati i druge državne službenike iz kantonalnih ministarstava i drugih kantonalnih organa uprave i stručnjake na profesionalnom radu u naučnim ustanovama i drugim pravnim licima.

(2) O angažovanju lica iz stava (1) ovog člana, odlučuje komandant Štaba civilne zaštite, na prijedlog načelnika ili člana Štaba civilne zaštite, a u slučaju spriječenosti komandanta, odluku donosi načelnik Štaba civilne zaštite, na prijedlog člana Štaba civilne zaštite.

Član 12.

(Sjednice Štaba civilne zaštite)

(1) Sjednice Štaba civilne zaštite saziva i njima predsjedava komandant Štaba civilne zaštite.

(2) U slučaju da je komandant spriječen da vrši svoju funkciju, sjednice Štaba civilne zaštite saziva i njima predsjedava načelnik Štaba civilne zaštite.

(3) Štab civilne zaštite donosi Poslovnik o radu.

Član 13.
(Pečat Štaba civilne zaštite)

Štab civilne zaštite ima pečat koji se izdaje u skladu sa Zakonom o pečatu Kantona Sarajevo („Službene novine Kantona Sarajevo“, broj 3/09 - Prečišćeni tekst).

Član 14.
(Sjedište Štaba civilne zaštite)

Sjedište Štaba civilne zaštite je u Sarajevu, a sjednice se održavaju u mjestu određenom u Poslovniku o radu Štaba civilne zaštite.

IV - OSTRUČNI POSLOVI ZA POTREBE ŠTABA CIVILNE ZAŠTITE

Član 15.
(Stručni poslovi za potrebe Štaba civilne zaštite)

(1) Stručne poslove za potrebe Štaba civilne zaštite vrši Uprava.

(2) Uprava za potrebe Štaba civilne zaštite obavlja stručne, administrativne, tehničke i druge poslove neophodne za rad Štaba civilne zaštite, što se bliže utvrđuje Pravilnikom o unutrašnjoj organizaciji Uprave.

V - OPREMANJE I FINANSIRANJE ŠTABA CIVILNE ZAŠTITE

Član 16.
(Opremanje Štaba civilne zaštite)

Štab civilne zaštite oprema se odgovarajućom opremom i materijalno-tehničkim sredstvima koja su Štabu civilne zaštite neophodna za ličnu zaštitu članova Štaba civilne zaštite, kao i za izvršavanje zadataka iz njegove nadležnosti.

Član 17.
(Finansiranje rada Štaba civilne zaštite)

(1) Finansiranje rada Štaba civilne zaštite vrši se:

- a) sredstvima predviđenim u Budžetu Kantona Sarajevo,
- b) sredstvima predviđenim u članu 180. Zakona,
- c) sredstvima iz donacija i drugih propisanih izvora finansiranja.

(2) Sredstva potrebna za rad Štaba civilne zaštite, kao i finansijski plan, utvrđuje Štab civilne zaštite.

(3) Naredbodavac za finansijska sredstva iz stava (1) ovog člana je komandant Štaba civilne zaštite, a u slučaju njegove spriječenosti, načelnik Štaba civilne zaštite.

VI - PRELAZNE I ZAVRŠNE ODREDBE

Član 18. (Rok za postavljenje članova Štaba civilne zaštite)

Postavljenje članova Štaba civilne zaštite izvršit će se najkasnije u roku od 15 dana od dana stupanja na snagu ove uredbe.

Član 19. (Prestanak važenja ranije uredbe)

Danom stupanja na snagu ove uredbe, prestaje da važi Uredba o osnivanju Štaba civilne zaštite Kantona Sarajevo („Službene novine Kantona Sarajevo“, broj 8/05).

Član 20. (Stupanje na snagu)

Ova uredba stupa na snagu narednog dana od dana objavljivanja u „Službenim novinama Kantona Sarajevo“.

Broj 02-05-16920-8/13
07. juna 2013. godine
Sarajevo

Premijer
Suad Zeljković, s. r.